


Paradanan Grandi a habri cu Massive Brass cu nan estilo unico



ORANJESTAD (AAN): Un forma diferente di presenta Brassband por a wordo mira Diasabra merdia, y tambe Diadomingo mainta durante e Paradanan Grandi di tanto San Nicolas y Playa respectivamente. Riba un trailer mahestuoso, Massive Brassband atrobe a duna un fenomenal homenahe dirigi na e musica di Asambeho cu ta algo unico di Aruba. Y e biaha aki sosteni pa e.o. Go Cultura Foundation, y tambe Aruba Tourism Authority.

E idea tabata great! Un trailer lastrando e Brass Section na haltu, y abao por mira tur snares y drums ta wordo toca. Un celebracion di Cultura, Musica y Magia Carnavalesco.

Go Cultura Foundation ta sinti hopi honra, agradecido y entusiasmo pa colabora atrobe cu Aruba Tourism Authority (A.T.A.) pa un otro proyecto espectacular di Carnaval. E aña aki, a presenta cu gran orguyo, Massive Brassband. Cu un tributo na algo netamente di nos y cu ta forma parti importante di nos herencia musical: Asambeho.

Massive Brassband su musiconan talentoso lo sacudi e cayanan di Aruba durante Carnaval 71 cu un energia sin igual. Nan a presenta un ritmo contagioso, vibracion incontrolabel y un sonido cu ta impacta henter bo curpa.

